

löblichen hohen Priuilegion den Landtmessern gegeben/ genugsam sehen wird. Denn lesset man doch in wolgeordneten Städten/ desgleichen auff den Hohen Schulen keinen zu einem Handtwerk oder Kunst kommen/ oder dasselbige treiben/ es sey so geringe als es j̄mer wolle/ ehe er zuuor das Meisterstück gemacht vnd gezeiget hat/ damit man sehen kan/ ob er bestehen köndte oder nicht/ Also vnd viel mehr sollen solche Gesellen zuuor auff das Rechenbenclein oder Probirbenclein gesetzt werden/ betrug vnd vnrecht zuuorhüten. Dargegen aber ist recht vñ wolgethan/ das man in etlichen Städten/ Dörffern vnd Schlössern gewisse Messruten/ Stangen oder Ketten hat/ damit zumessen/ Aber was hilfft das/ wenn sie nicht recht gebraucht werden/ Den es gehöret mehr darzu/ das sich einer ein Landtmesser oder Feldtmesser heissen lesset/ vnd sich bey dem Pawersvolck rühmet/ Er kan rechnen wie viel Krahen auff einem Morgen oder Gewende Ackers sitzen mögen/ Wenn sich aber einer nicht weiter anmasset/ als er zuuerichten weiß/ so thut er recht/ vnd behelt ein gut Gewissen/ darff sich auch endtlich keiner schande oder straffe von Gott noch den Menschen disfalls besorgen/ Dieweil es auch die erfahrung gibet/ das kein selbst angenommen ding vnd falscher schein in die lenge oder harre bestehen